

# Qalam

Bilangan 102

Jamadilakhir 1378

Januari 1959

60 sen

## Siaran Radio Malaya

Beberapa orang yang terkemuka telah menarik perhatian kita dengan cerita-cerita yang dibuat di dalam sandiwara radio, dan cerita-cerita seram di Radio Malaya. Telah lazim, kata mereka, apabila ada ketentuan hari siaran itu maka kanak-kanak yang sudah gadis atau pun yang belum gadis menunggu di peti-peti radio mereka untuk mendengar siaran ini bersungguh-sungguh. Hampir-hampir tiap-tiap orang-orang Melayu tidak terkecuali di mana-mana pun terjadi demikian itu.

Ini adalah menunjukkan bahawa siaran bahagian-bahagian itu sangat menarik pendengar-pendengarnya, Melayu. Tetapi pendengar-pendengar yang berfikiran panjang adalah sangat-sangat berdukacita mengenai kandungan-kandungan ceritanya kerana boleh dikatakan bahawa cerita-cerita yang dihidangkan adalah hampir-hampir semuanya tidak lain daripada mengenai perkara-perkara asyik dengan mahsyuknya sahaja.

Jika orang ramai membantah buku-buku cerita asyik dan mahsyuknya dibaca oleh orang-orang yang belum dewasa atau yang sedang naik maka yang demikian itu masih dapat dikawal iaitu dengan menyembunyikan buku-buku itu daripada dapat dibaca tetapi kalau cerita-cerita seperti ini di dalam siaran radio maka adalah sangat sulit untuk dikawal kerana belum lagi orang-orang di rumah tahu bila saatnya

cerita itu tersiar maka kanak-kanak sudah pun berada

di tepi radio untuk mendengarnya.

Tidak dapat dinafikan bahawa bahaya-bahaya yang bakal menimpa pertumbuhan kanak-kanak dengan cerita-cerita itu sangatlah besarnya dan kerana itu mustahak benar pihak Radio Malaya tatkala mengadakan siaran-siaran itu berhati-hati. Mereka patut memikirkan bahawa pendengarnya tidaklah hanya terhad kepada orang-orang yang tahu memikirkan mana yang baik dan mana yang buruk, tetapi siaran-siaran itu adalah didengar oleh am, dari kanak-kanak yang baharu berumur 5 atau 6 tahun lagi.

Segala cerita-cerita itu adalah memberi kesan yang tidak baik di dalam pertumbuhan-pertumbuhannya kerana mereka menyangka bahawa itulah cara hidup di dalam masyarakat kita, kahwin bercinta-cinta dahulu atau seumpamanya. Di dalam cerita-cerita itu mestilah dijauhkan gambaran hidup seolah-olah hidup di bandar itu sebagai hidup di dalam syurga percintaan dan seumpamanya. Menanam semangat-semangat ini kepada kanak-kanak yang belum tahu akan baik dan buruk sesuatu sebenarnya sangat berbahaya.

Kita berharap, untuk keselamatan perkembangan bangsa Melayu masa yang akan datang hendaklah Radio Malaya menapis segala cerita-ceritanya dengan sehalus-halusnya dengan memikirkan bahaya cerita-cerita sandiwara yang disiarkan mereka tidak dapat dikawal daripada didengar oleh kanak-kanak yang kecil-kecil lagi. Ini adalah suatu kewajipan bagi mereka memerhatinya, jika sekiranya Radio Malaya itu difikirkan untuk membawa kebaikan kepada masyarakat.

Adapun mengenai cerita seram, kita berpendapat, cerita-cerita semacam ini hendaklah dihapuskan sekalipun ia digemari. Cerita-cerita ini menanam kepada pendengar-pendengarnya,

terutamanya kanak-kanak, kepada berperasaan takut dan bacul, menanam perasaan percaya kepada tahayul-tahayul dan jampi kerana kita mengetahui sendiri bahawa banyak isi rumah, kanak-kanaknya sebelum dan hingga kepada umur dewasa apabila malam hari takut hendak pergi ke dapur rumahnya setelah mendengar cerita-cerita itu.

Untuk suatu bangsa yang baharu tumbuh maka sepatutnya bagi mereka hendaklah diberi semangat percaya kepada diri, semangat berani dan tabah hati, semangat kepahlawanan dan semangat keperwiraan dan semangat kesatria – bukan dihidupkan semangat penakut, semangat percaya kepada hantu jembalang dan sebagainya yang merosak kepada jiwa pertumbuhan anak-anak kita.

Semoga kesalahan-kesalahan dan ketelanjuran yang berlaku di dalam Radio Malaya ini, tidaklah hendaknya dibiarkan terus menerus tetapi hendaklah diadakan perubahan. Di dalam cerita sandiwara hendaklah dibuat cerita-cerita yang memberikan erti hidup di dalam masyarakat dengan suatu binaan yang baik – menjauhi dari membawa riwayat “hidup berkehendak”<sup>1</sup> sahaja.

Cerita-cerita seram, menurut pendapat kita hendaklah diberhentikan digantikan dengan cerita-cerita yang menumbuhkan semangat-semangat keberanian, semangat percaya kepada diri sendiri dan seumpamanya, supaya jiwa pendengar-pendengarnya semenjak dari kecil lagi tersemai gambaran-gambaran hidup keperwiraan bangsanya.

### **Ke Mana Kita Dibawa?**

Datuk Yahya bin Abdul Razak, di dalam Majlis Mesyuarat *Federal* telah menyatakan ketidakpuashatinya tentang rancangan menolong ekonomi orang-orang Melayu. Ia

menyatakan tidak ada ertinya mengadakan latihan-latihan memimpin orang-orang Melayu di dalam perkembangan menjual ikan kering dan belacan. Kalau hendak menolong ekonomi Melayu maka berilah tender-tender di bawah \$50,000 kepada perusahaan-perusahaan Melayu atau pun seumpamanya, percetakan-peracetakan di Kementerian Pelajaran hendaklah diberi kepada perusahaan Melayu.

Di dalam menjawab kepada pendapat Datuk Yahya itu, Menteri Abdul Aziz bin Ishak menyatakan bahawa dasar kerajaan adalah memberi pertolongan yang merata dan tidak ditujukan kepada menolong menjadikan kapitalis-kapitalis. Cara pertolongan yang diberi hendaklah merata dan sebab itu dasar pemberian bantuan itu diutamakan dengan menerusi syarikat kerjasama.

Sekali dengan jawapan Menteri Abdul Aziz ini memang benar dan memang pada tempatnya tetapi apabila dikaji semula maka timbulah perbezaan pendapat. Menteri Abdul Aziz seolah-olah takut ada kapitalis-kapitalis daripada bangsa Melayu. Di manakah kapital-kapital Melayu yang besar yang ada di Persekutuan sekarang jika dibanding dengan orang-orang yang bukan Melayu?

Dengan menjauhkan segala kebolehan yang ada kepada orang-orang Melayu untuk membuat sesuatu kerja, jika tidak diberi bantuan dan kawalan sudah tentu mereka tidak akan dapat bersaing dengan perusahaan-perusahaan asing kerana sudah lazim, perusahaan asing itu berani rugi di dalam kerja-kerjanya kalau ia mengetahui bahawa ada persaingan dengan orang lain, terutamanya dengan perusahaan bangsa Melayu.

Dengan menolong begitu sahaja syor Datuk Yahya maka berertilah bahawa yang dimaksud bantuan kepada iktisad

1 Dalam majalah Qalam ditulis sebagai ‘hidup berkendak’